《赤壁赋》

壬戌之秋,七月既望,苏子与客泛舟游于赤壁之下。<u>清风徐来,水波不兴。举酒属客,诵明月之诗,歌窈窕之章。少焉,月出于</u>东山之上,徘徊于斗牛之间。白露横江,水光接天。纵一苇之所如,凌万顷之茫然。浩浩乎如冯虚御风,而不知其所止;飘飘乎如遗世独立,羽化而登仙。

于是饮酒乐甚,扣舷而歌之。歌曰: "桂棹兮兰桨,击空明兮溯流光。渺渺兮予怀,望美人兮天一方。"客有吹洞箫者,倚歌而和之。其声鸣鸣然,如怨如慕,如泣如诉,余音袅袅,不绝如缕。舞幽壑之潜蛟,泣孤舟之嫠妇。

苏子愀然,正襟危坐而问客曰: "何为其然也?"客曰: "'月 明星稀,乌鹊南飞',此非曹孟德之诗乎?西望夏口,东望武 昌。山川相缪, 郁乎苍苍, 此非孟德之困于周郎者乎? 方其破荆 州,下江陵,顺流而东也,舳舻千里,旌旗蔽空,酾酒临江,横 槊赋诗, 固一世之雄也, 而今安在哉? 况吾与子渔樵于江渚之 上, 侣鱼虾而友麋鹿, 驾一叶之扁舟, 举匏樽以相属。寄蜉蝣于 天地,渺沧海之一粟。哀吾生之须臾,羡长江之无穷。挟飞仙以 遨游,抱明月而长终。知不可乎骤得,托遗响于悲风。" 苏子曰: "客亦知夫水与月乎? 逝者如斯, 而未尝往也; 盈虚者 如彼,而卒莫消长也。盖将自其变者而观之,则天地曾不能以一 瞬; 自其不变者而观之,则物与我皆无尽也,而又何羡乎! 且夫 天地之间,物各有主,苟非吾之所有,虽一毫而莫取。惟江上之 清风,与山间之明月,耳得之而为声,目遇之而成色,取之无 禁,用之不竭,是造物者之无尽藏也,而吾与子之所共适。" 客喜而笑, 洗盏更酌。肴核既尽, 杯盘狼籍。相与枕藉乎舟中, 不知东方之既白。